

Lufunjisho lwa pa bademona

Kibese kya ku Mubiji

🦋 Pano Na...?... [Kafwapo bijipo pa tepu ne—Waku.] Akye kyo kimye kitanshi kyo Naubapo mu mbung'eno iji yonse yo Najinga nayo mu bujimi. Akye ke kimye kipya. Mulongo Baxter waya; kabiji—kabiji Mulongo Bosworth uji ku India, nangwa, Africa; kabiji Mulongo Baxter, Amiwa kechi nayuka koanji ne. Aye waya kuntu kumo, kabiji ne bonsetu bashala bafumapo baya. Kabiji Billy ne Amiwa tuji kuno bunke, nanchi tujitu na kimye kyawama: waimana, waipaya ne kuja waja. Nanchi, atweba—atweba tuji na ng'umvwino ya kuuba mba kape twakonsha, na bukwasho bwa Nkambo, twakonsha kutwajijila na mpwijilo, atweba bene. Ao oene mambo o Njina lusekelo pa kwikimona kyatwajijila pacheche, na mambo a kintu kimo. Naketekela mba Nkambo usa kwitukwasha kwikyuba. Bino, mwayuka mba kuji...

Natemwa bakalama bami. Amiwa njina balongo batemwe, Bosworth, Baxter, Lindsay, Moore, bonse, nji na faivi, Baron von Blomberg. Ke banabalume bawama bingi. Bino kujipo kintu kimo pakyokyo, inge waikala na jibumba ja bantu baji pamo, umo uji na kintu kimo, umo uji na kikwabo. Kimye kimo akyo kikala kypusanako na kyo Ndanguluka amiwa mwine. Nanchi Na—Na—Naumvwa nobe Nji wakasuluka pano. Twakonsha kwikala na kimye kyawama bingi, ntuvuungulule maboko etu, ne kutwelamo na kuja. Mbena kulanguluka pa kuvuungulula maboko etu kabiji ne kwikala na—na kimye kyawama.

Baibolo Wami mutanshi wajinga mubilengwa na lesa. Nafunjile Lesa kupichila mu bilengwa na lesa. Kabiji Natemwa kuloba masabi. Byo Natemwa kuloba masabi! Kabiji ne anweba mwateremwa kuloba masabi, mwanami nsongwalume? Inge watemwa kuloba masabi, ne kutemwa bainobe, ukekala nsongwalume wawama. Nangwatu kwaluluka kwami kechi kwikifumishemo kyonse mwi amiwa ne. Nanchi juba jimo Najinga mu mitumba, na kuloba kwalepa. Pano, akye ke kyakukwashatu awe nsongwalume mucheche. Kabiji Nalobelenga momwa mu mitumba... Kabiji na mambo abakwabo banyike, ne abo, baikala muno. Kabiji Naile na kuloba makamba. Kabiji, oo, ke kintu kyawama bingi mu kimye kya kinsalo. Amiwa ngya byonkabya, kabiji kwajinga jikamba mu kimbo kyalondejilepo, mwayukatu, byonkabya. Kabiji nantakaikilenga Nkambo kabiji najinga na kimye kyawama, kya kubijika. Kimye kimo, naponsha kanda nkami panshi. Naketekela mu kubijika. Amena. Amiwa kine nguba. Mambo,

Nayuka mba kintu kimo kyakwata, kabiji kyubapo kintu kimo kwi amiwa.

² Nanchi Naileko kulutwe alwa lukeelo, kabiji byo Nabwelele, kintu kyeenyi kyamwekele: Kuji ba mbeyala bavula bingi mu kyaalo kokwa, mu New Hampshire. Amiwa njina kambi icheche kokwa, Nkongya na kuloba. Kabiji Najinga na teete mucheche wakala waimikwa, kamwimba kacheche kakala Nkonaikalangamo. Kabiji mbeyala ufita kyo kintu kyakila mu kunshita kijiko. Nanchi, inaji mbeyala wakala wajinga na baana watwelele monka, kabiji batabawile teete wami!

³ Pano, mwalanguluka mba Nafwajilwe kuuba ka na yewa mbeyala, nsongwakazhi mucheche kunyuma koko na suki yachila, kunyuma kokwa? Nafwajilwe ku mulondela kyabaya, kechi Nakonsha kwikyuba nyeni?

⁴ Bino kiky'e kyo aubile. Watwelele mukachi, watabawile teete ne kupalang'anya bintu byonse, kabiji ne kuja kajo kami konse ko Najinga nako, kabiji wajingatu bulongo. Nanchi byo Nafikile, waimana kaye ne kuya. Kabiji wabijikile ku twaana twanji, kabiji kaana kamo kanyemene pamo naji. Kabiji mukwabo kechi wanyemene ne; aye waiketu popa. Wajinga wavundamina nyuma yanji kwi amiwa, nobe bibye, kabiji waubilenga kintu kimo. Kabiji kechi Najinga na kintu mu kuboko kwami ne kanatu ka katemo kacheche kakala. Natetawilenga bakulumpe kokwa. Kyawama, wanyemene lubilo, oo, Naketekela pepi nobe akya kichi kyasupwa kya mafoni popa, waikala panshi. Aye watamine muteto ku mbeyala mukatampe, kabiji kechi wateleko muchima ne. Aye watwajijiletu kasa aikala ponkapa.

⁵ Nalangulukile mba, "Awa mulongo mucheche ubena kuba ka?" Naendeleo kufwenya pepi. Najinga na mooyo kufika pepi, mooyo wakuchina ku nkwalaula. Nanchi—nanchi Amiwa—Amiwa kechi namwenepo kichi ne, kabiji Nayuka mba wakonsha kukajila ne aye. Nanchi, kabiji kechi Nakebelenga kufwenya pepi ne aye ne, mambo Nayuka musango wa byubilo bya mbeyala. Nanchi, Nafwenyeneko pepi pacheche. Kabiji mwayuka kyamwekele nyi?

⁶ Bino, Amiwa natemwa tumakeke. Baanga ba mwi anweba batemwa tumakeke? Oo, mulunda! Oo, Ami . . . Bansonwalume bakulumpe, ne abo. Nebamona basutula maboko abo peulu. Atweba bonse twatemwa tumakeke, kabiji Amiwa ne atemwa, kabiji Natemwa kwichilapo buki. Byonji Baptist, mwayukatu, akyo kyo kitulengela kololwa, mwayukatu, ke buki, mwayukatu. Nanchi, kabiji telekai, Amiwa kechi ne basansa ne, Ne abatizhatu. Amiwa kine ngitulwila ponka po kyawamina ne kunema. Amiwa kechi nsasatu pacheche papo ne popa ne. Amiwa kine ngitulwilapo, ngyuzha byonse na buki.

⁷ Kabiji pano, mwayukatu, Najinga na mbekete ya buki momwa, mbekete afu galoni ya buki. Kabiji bambeyala batemwa

bingi buki. Nanchi awe mulunda mucheche watwelele monka ne kufumyapo kizhiko pa kibekete kya buki, kabiji waikele nobe bibye, na kikye kimbekete kicheche kya buki mu maboko anji, nobe *bibye*. Aye uji na... Kabiji aye kechi wayukile mwakujila ne, nobe byo mwafwainwa anweba, mwayukatu, nanchi utupamotu kibondo kyanji ne kufyopako nobe byobya, kabiji wafyopako. Kabiji wabwela waaluluka watala kwi amiwa, kabiji meso anji acheche ekwachile pamo, jivumo janji jicheche jajinga jashingakana, na buki. Aye waiketetu ponkapa, na kutupamo kuboko kwanji wabwela wafyopako buki, nobe *byobya*, monka mo akonshesha kubila.

⁸ Oo, ami, Nalangulukilenga pa mpwijilo yawama ya musango-wakala ya Mupashi Wazhila, umvwe twazhikulapo pa kimbekete, ne kutwezhamo kuboko kwetu mu kimbekete ne kufyopako. Twajijilatu na kuuba, mwayukatu, na kufyopakotu.

⁹ Kabiji mwayuka kintu kyasekeshenga, nangwa byonkabyo? Panyuma awa mulongo mucheche watolamo monka mwafwainwa, walekelako ku mbekete kabiji bwabwela bwaichikamo ponkapa. Mwayuka kyamwekele nyi? Inaji mbeyala ne tukwabo twana twatatula kumufyopa, na kumufumya buki.

¹⁰ Nanchi, kyawama, kapepo mpwijilo yetu isakwikala mu yekao musango, Naketekela, nanchi twakonsha kutwajijilatu na kubuula bakwetu, lukumo lwa Lesa lubena kuponena pe atweba. Kijitu bulongo.

¹¹ Amiwa njibingi na lusekelo pa kwimumona baana babacheche. Natemwa kwimubuula kintu kimo kiji byobyo. Kabiji kapepo keesha mabaanga, tukekala na kimye kyabaya, kabiji—kabiji twakonsha kwamba kyabayako pacheche. Kabiji tusa kwamba kwi bataata ne bamaama kintu kimo pa kino kimye.

¹² Tusa kwamba pa *Lufunjisho lwa pa bademona*. Mu Masalamo 103:1 kufika ku 3, tutange ao maveeeshi. Pepi nobe yense wamwingilo ne musapwishi, nangwa utanga Baibolo, wibilabijila bye na muchima.

Utakaike aye YEHOBA, Obewa muchima wami: kabiji ne byonse biji mwi amiwa, bitote jizhina janji jazhila.

Utakaike aye YEHOBA, Obewa muchima wami, kechi uvulame byanji byonse byawama ne:

Ye ukulekela bibi byobe byonse; ye ubuka bikola byobe byonse;

¹³ Nasaka mba mumone papo, kyajinga mba “byonse.” “Ye ukulekela bibi byobe byonse, Ye ubuka bikola byobe byonse.” Pano twayai tukunyike mitwe yetu pa kakimye kacheche.

¹⁴ Pano, Taata Wamwiulu, twi musachila Anweba mute uno, pa kutanwa muno. Twimusachila Anweba pa babo baana

babacheche baikala muno, bo banabalume bakekalako keesha, ne banabakazhi, inge kwatanwa keesha, inge Yesu wabanda kwiya. Kabiji pano, Taata, twalomba mba—mba Anweba musa kwitupesha pano byo tubena kwamba pa Kyambo Kyenu, kabiji ne pa mulwanyi mukatampe ye tuji nanji, Satana. Twalomba, Lesa, amba Anweba musakwituswisha kubika kulutwe, jibumba jiji na bilwilo, bulume bwa Lesa, bakonsha ku mwinema bufuku buno ponsetu po aimena, Nkambo, ne ku mumweshwa mba kechi ujipo na nsambu nangwa pachechetu ne, amba Kilishitu wamushijile mu kifulo kyetu pa Kalvali, kimye Aye kyo afwile, kabiji Aye waonawine baluusa bonse ne kumwangata Satana bonse—bonse bulume bo ajinga nabo. Kabiji, Lesa, tupai maana kabiji ne kukwatakanya pano, a kuyuka ne kulondolola ku bantu pa kuuba mba bayuke mwakutambwila lubuko ne kushinda Satna. Mu Jizhina ja Yesu twalomba. Amena.

¹⁵ Pano mu kimye kicheche tusakwamba pa *Lufunjisho lwa pa bademona*. Mumvwa javula bingi pa bya bademona. Pano, keesha mabaanga kape twakonsha kupwisha. Nakebelenga mooba abiji a mu ye uno mulunngu, nangwa byonkabyo, kusapwila pa kikyeye, nobe. . . nangwa moba abiji a kupwila kwa mabanga, na kwambatu pa kikyeye.

¹⁶ Pano, kintu kitanshi, demona ye muka. Mumvwa javula bantu na kwamba pa bya demona. Kyawama, pano, awa “demona, diabola,” byonse bifuminatu ku kyambo kimo, kabiji mu Kizungu kyatelwa mba “umanyika.” Muntu umanyika ke diabola, uba kibi. Aye waamba. . . Pano, Baibolo leelo, ku bavula, ku bantu bavula, ke buuku wakala wakunyuma ao ye batanganga bankambo babalume ne babakazhi, nangwa kintu kimo kiji mu yeo musango. “Kechi ujipo na kintu kyanema ne, ke wa bantu bakala, kabiji ne bikwabotu.” Bino akyo ke kilubo. Ke wa bantu bonse. Kabiji bademona ke bintu bimanyika abya bitumanyika.

¹⁷ Pano, kuji bademona beya mu mweo wa muntu, ko kuuba mba, mwaila ng’ambilo, akyo kyakonsha kwikala—akyo kyakonsha kwikala mu. . . Nakonsha kwamba bibye, nangwa byonkabyo, demona awa wiya mu mweo ke kintu kimo kimanyika mweo.

¹⁸ Bimye byavula mwakonsha kumona muntu kapepo wakonya. Bino, kapepo wakonsha kwikala muntu waaluluka, wayulwamo na Mupashi Wazhila, nangwa byonkabyo waikala mukonye wapwijijika. Mwamona? Abyo ibyo. Akyo kechi kijipo na kintu na mweo ne. Ke umanyika, monai, kintu kimo kibamanyika.

¹⁹ Pano, misongo yonse, twafwainwa kutana kitanshi mba misongo yonse ifuma kwi diabola. Lesa kechi ye nsulo ya misongo ne. Kafwako misongo ifuma kwi Lesa ne. Lesa kimye kimo uswisha Satana kubika misongo pe obewa, kwikala nobe kikoote kya kukubwezha ku nzubo yakwa Lesa, inge wabula

kukokela. Bino misongo, mu tatwile yayo, ifuma kwi diabola. Mwakonsha kulanguluka mba muntu wakonsha kuketekela mba Lesa, Taata wetu Wamwiulu, wakonsha kwikala ntendekelo ya kyokyo kintu kiji nobe misango ne lufu nyi? Kyawama, ine, Aye kechi byo anji ne, kechi wajingapo byobyo ne, kechi ukekalapo byobyo ne. Lesa uswisha lufu mambo a kubula lukokelo. Lesa uswisha lufu. Byonka byaambile munembeshi umo amba, “Byonse byakonsha kuuba lufu, Lesa wiluleta ke motoka witundoosela mu Kyeenyi kya Lesa, ku waitabila.” Pakuuba kyambo kya *lufu* kyalumbulula mba “lwabano.”

²⁰ Yesu waambile mba, “Aye umvwa Byambo Byami ne kumwitabila Aye Wantuma, uji na Bumi bwa myaka.” Kabiji Aye waambile mba, “Amiwa ne lusanguko, Bumi, awa waitabila mwi Amiwa, nangwa afwe, byonkabyo ukekala na bumi, kabiji yense uji na bumi ne kwitabila mwi Ami kechi ukafwa ne.” Kabiji tubika mibiji ya umo ne mukwabo mu bilende byabula kuzhila. “Bino aye kechi ukafwa ne.”

²¹ Pano inge mwakonsha kumona byo Aambile pe Lazalaza, Aye waambile mba, “Lazalaza walala mutulo.”

²² Baana babwanga, bantu byonka byo tuji, baambile mba, “Oo, inge walala nishi wauba bulongo.” “Aye watazhizhe mu kuuba mba kukokoloka,” byo balangulukilenga.

²³ Bino Aye wayishile ne kwisamba nabo mu mulaka wabo. Aye waambile mba, “‘Aye wafwa,’ kyo mwaketekela. Bino,” waambile mba, “Amiwa nakamubusha, ku mubusha.” Mwamona? Mwamona? Inge uji na . . .

²⁴ *Lufu* kyalumbulula mba “lwabano.” Pano, inge umo wa mwianweba wafwainwa, umo wa mukisemi wafwa, nangwa kintu kimo, aye uji, inge waaluluka, kechi wafwa ne. Wafwa mwaila bumuntu. Bino ba abanwatu ne atweba, bino kasa baji mu Kyeenyi kya Lesa. Abo kechi bafwa ne, kabiji kechi bakonsha kufwa ne, kechi kyakonsheka kwi abo kufwa ne. Yesu waambile mba, “Aye umvwa Byambo Byami ne ku mwitabila Aye watuma Ami uji na Bumi bwa myaka, kabiji kechi ukeya mukinje ne, pakuuba wafuma kulufu ne kuya ku Bumi.” Nanchi, aye kechi wakonsha kufwa ne. Kyonse kintu kibula kufwa, Peenape, kechi kyonaika ne. Ke Bumi bubula konaika. Aye uji Nabo mambo Lesa wa Mupabo. Kabiji kechi—kechi kya kwitotelamo ne; kiji ne . . . Kyaikala kyabula mikambizho. Lesa Wibupana kwi aye.

²⁵ Lesa wita. Kafwako muntu nangwa umo wakonsha kwiya kwi Lesa ne kanatu Lesa wamwita. Yesu waambile mba, “Kafwako muntu nangwa umo wakonsha kwiya kwi Amiwa ne kanatu Ba Taata bamwita, bamukoka.” Abyo ibyo? Nanchi ke Lesa mu byonse. Kapepo keesha mabaanga tokomvwa byavulako pacheche pa kyokyo, mambo Nasaka kuleta kikyeye kintu kya *misongo*, kwi anweba, pakuuba mba mwikimone kikyeye.

26 Kuji kimye kyo twamenene mwi ba nkambo yabo-bataata. Mwayuka kyokyo. Dokotala wayuka kyokyo. Kyawama, mwayuka, ne anweba, anweba mutanga Baibolo. Anweba mwayuka mba kakishi ka bumi katatwijile mu ba nkambo yabo-bashenu, kwikala ke kakishi, kabiji ne kufika mu ba nkambo yobe babalume, kyaiya mwi bashobe, pano kyaiya mwi ba inobe monka mo uji kino kimye. Abyo ibyo. Kinembelo kifunjisha kyokyo. Kino kyo Kinembelo inge mubena kukeba. Naketekela mba Kyaambile mba Levi wapaine bya bujikumi kimye kyo ajinga mukifuka kya kwa Abulahama, ao wajinga bankambo yanji-bashaji. Abyo ibyo nyi? Nanchi, monai, kakishi katatwile kunyuma kokwa.

27 Pakuuba myeo yenu yalengelwe kitendekesho kya ino ntanda kasa kikyangye kwikalako, kimye Lesa kyo alengele muntu mu kipasha Kyanji Mwine; mupashi wa muntu; kechi muntu *mu* kipasha Kyanji Mwine ne, pakuuba *muntu* mu kipasha Kyanji Mwine. Mwamona? Kabiji Aye wibalengele mwanamulume ne mwanamukazhi, Aye kasa akyangye kwikala na muntu wafuma ku lukungu lwa panshi ne. Inge twajinga na kimye mabaanga ano, inge twasenda kimye kyabaya twabwela pakyokyo. Monaitu Lesa . . . Pano, kiji pakachi ka mulaini, bino, inge mwamona, kiiya mu ndoonda ya mulaini. Mwamona? Abyo Lesa, kunyuma mu ntendekelo, byo Aubile kokwa, kabiji Aye byo aendele kwiya pano pantanda kabiji ne byo Alengele muntu mu kipasha Kyanji; kabiji pano Lesa wabwelele wa mulenga mu kipasha kya muntu, pakuuba mba akule muntu.

28 Pano, kimye Lesa kyo alengele muntu mu kipasha Kyanji, aye wajinga muntu wa bu mupashi. Kabiji kechi kwajingapo muntu wakujima mushiji ne. Nanchi Aye walengele muntu kufuma mu lukungu lwa panshi. Bino, mwayila balonda bintu byapita, ne bikwabotu, kabiji ne baabo bantu bapesapesa ne kutola bikupa byakala, kabiji ne bikwabotu, ne kuketekela mu kupipulwa kwa bintu . . . Amiwa naketekela mu kupipulwa kwa itabilwa. Muntu upipulwa mukachi kanji aye mwine, bino kechi yense kufuma mu kakishi kamo ne. Ine, mwane, mambo ka— kang'onyi kaikala kang'onyi kufumatu kimye Lesa kyo ekalengele kwikala ng'onyi, kabiji kolwe wajinga kolwe, muntu wajinga muntu. Abyo ibyo.

29 Bino, Naambilenga ku dokotala kuno kimye kicheche kya kunyuma, mu Louisville. Aye waambile mba, “Kika, Rev. Branham!” Naambilenga pa bantu bena Africa, byo baja, bayatu panshi . . . Oo, bintu bimo byakila mukutama byo mwabula kumonapo, byo baja! Abo batolatu bintu biji na ndochi, biji na mapila, be bipapulatu, mapila ne byashala. Kechi kijipo na lupusano kwi aye ne. Mwamona? Abo baamba mba . . . Kutoma kiji kyonse, kechi kipanapo lupusano luji lonse ne. Aye waambile mba, “Bino, Rev. Branham, aba bantu kechi baji na buntu ne.”

Naambile mba, “Oo, ee, byo baji. Kine abo ke bantu.”

³⁰ Naambile mba, “Kintu kyafwenya pipi ku bumuntu, mwaila banyama, ke kimpanzee. Kabiji mwaeseka pa myaka biumbi bina na kufumyamo kunyinyita mu kimpanzee, kabiji kechi wakonsha kwikyuba ne,” Naambile mba, “mambo kechi wakonsha kulanguluka ne. Aye kechi ujipo na kya kulangulukilako ne.” Oo, mwakonsha ku mufunjisha tu bintu tuheche nobe biji mbili, gii ne waw, nangwa kumwala magalasi, nangwa kupepa fwesho, nangwa kwenda pa kinga, nangwa kwendesha mbili, nangwa kintu kimo kya mu byobyoy, bino kijitu pamo nobe “gii” ne “waw” ku mbili, nangwa “wiiti” ku kabwa, nangwa kintu kimo kya mu byobyoy. Naambile mba, “Aye ye nyama.”

³¹ “Bino lekai mbwele ku Africa, ku mukoka uji mwine mungye, kabiji ao ye mukoka muheche wa bambwena kulipi.” Kabiji Naambile mba, “Kapepo bankambo-yaba nkambo yanji-yaba nkambo yanji-yaba nkambo yanji-yaba nkambo yanji kechi bamwenepo muzungu nangwa kikwobotu ne. Kintutu kyo ayuka, aye kechi wayuka kwepi ku kipiko nangwa kuboko kwa kilujo ne. Kintutu kyo ayuka ke kuja, kabiji aye uja byonka byo akonsha kubikapo maboko anji, inge mubiji wa muntu, nagwa kintu kiji kyonse, kechi kiji na lupusano kwi aye ne, aye kikulu waja. Pakuuba lekai namutole pa myaka faivi, ne pa myaka fifitiini ukamba Kizungu kyawama ne kufundatu bulongo. Kika? Aye uji na mweo. Lesa wamulengele kwikala muntu, kabiji uji na nsambu ya kumvwa Mamboawama, nangwatu jimo, byonka byo tusapwila kuno, konse konse mu America, ku bantu, jikwabo ne jikwabo ne jikwabo, na kusashijila, na kukokomesha ne bintu byonse. Lekai ekyumvwe kimye kimo, kabiji mwamumona wabijika ne kunyemena lubilo lubilo ku kitapisho.” Mwamona? Ee, mwane!

³² Abyo byo biji muchima wami, mulongo, leelo, inge Navuluka Africa, ne ooa maboko afita abukamulanda asutulwa peulu, kwaamba mba, “Mulongo Branham, ne jikwabo pa mambo akwa Yesu!” Oo, lusa! Mujipo kintu kimo mwi amiwa kipoya ne kupyana. Bukiji bukiji inge Nakumanishatu mali, Nafika konkakwa, ne ako. Akyo kyo Nguba na peny yense ye Ntambula, bintu byonse, Lesa wayuka, kufumyako byo Nakonsha kuja. Kabiji bantu bavula bampa byakumvwala byami. Kabiji ne byobyoy ke bya Nkukwasha kwikelamo, amiwa mwine, byo Nakonsha kuuba pepi pepi, Amiwa ntayatu mu mali abumishonale ao anengezhiwa na kafulunde. Amiwa kechi ndipila musoko pakyoyo ne. Kutambula fiili nangwa foolo, faivi sauzande madola, kabiji Amiwa ngabuka kubushiya kokwa na kusapwila Mamboawama ku bantu bo Nayuka mba pa joja juba Amiwa nkakumbula. Kabiji Nayuka kyo Mbena kupaina mukumbu.

³³ Naubanga, inge Naya mu muzhi, Naikala na mbung’eno yabaya kunyuma kinye kyo bajinga na mali avula, kabiji

baji na kipekenyi kyabaya bingi kya madola masauzande, Napananga ku kipamo kya Musalabo Wachila ne bikwabotu. Pano, pano, kechi kwibakajipila ne, pakuuba ubena kwiya mu mukwakwa kasa uji mu motoka wa foo-sauzade-dola, babikako ne byela bya golode, kupeepa ne fwesho, kabiji faivi aduleendi madola pa mulungu mali a bantu bakolw-. . . Ine, mwane! Ine, kinekine! Kabiji pa bibye, kabiji aku ulupukatu kusa ya mu muzhi, baamba mba, “booba kyongo kyazhila,” kabiji ne bintu byonse byonkabya, kabiji ne kusekesha, kabiji ne kulengulula bupopweshi bo twaimenapo. Ine, mwane!

³⁴ Ne asenda amiwa mwine, kabiji kumeso akwa Lesa mambo ye Mutonyi wami, Amiwa mbika mu mwingilo wa Mamboawama akwalepa, nanchi Nayuka mba pajoja Juba po Nkoba. . . byo Nkapana sawakya pa bukalama bwami, bwapanwa bulongo. Abyo kine ibyo, mambo mvuluka mba byo Mbena kukwasha bantu Mbena kupana bukwasho kwi Lesa. Mambotu byubilo byami kwi obewa byo biji byubilo byami kwi Kilishitu. Kabiji byubilo byobe kwi amiwa ke kintutu kimo, abyo ibyo, kwi Kilishitu.

³⁵ Pano, pakumona bantu muyewa musango, kabiji ne pakumona byo aji muntu, pano, uji na mweo ubula kufwa, wakonsha kubula kufwa, kechi wakonsha kufwa ne, kafwako kyo akonsha kuuba ne kanatu kwikala na Bumi bwa myaka ne myaka, amba Lesa pa buke bwanjitu, monka mwaila muchima Wanji Mwine, wikipaine kwi obewa. Kabiji pano, nanchi, pano Ami. . .

³⁶ Lekai ne kyolole pacheche, nangwa kwambapo kintu kimo. Muntu umo usakufumapo ne kwaamba mba, “Mulongo Branham ulonda ku salulwila jimo kwa Lesa.” Ine, Amiwa kechi byo nji ne. Amiwa ne Keovinisiti kikuluta Keovinisiti uji mu Baibolo. Pakuuba inge Keovinisiti wafuma mu Baibolo, nanchi Amiwa ne Amenyanizimu, mwamona. Naketekela mu Buzhile kabiji Naketekela mu Keovinisiti, ne apo. Bino, byonse bibiji, umo walupukamo ne kuya *mujije* jishinda, kabiji mukwabo wanyemena *mujoja* jishinda. Inge kechi kyajinga mambo a Buuku wa Efisesa ne, kwi kibwezha ne kwikibika mu kifulo kyakyo amo Lesa mo aubijile, atweba bonse inge twalubilamo. Bino bonse babiji baji na lufunjisho, bino baya ku lukunwa pa kyokyo, umo umo, abo ke Bololoke kabiji ne bu Keovinisiti, ne abo, ne Amenyani. Pano, Keovinisiti uji na kintu kya bukine. Naketekela mba—mba lufunjisho lwa Keovinisitiki. . .

³⁷ Naketekela kikye. Mu bukikizhi, Naketekela mba Kipwilo kiji na bukikizhi bwa Peenape. Yense utanga Baibilo wayuka kyokyo, mambo Lesa waamba kala mba Bakamweka kwiulu kwakubula ne jitomya ne. Abyo ibyo? Nanchi, Kikekalako. Abyo ibyo nyi? Aye Bi-. . . Akyo Kipwilo kiji na bukikizhi bwa Peenape. Pano, obewa uji mu Kipwilo, kyo kintu kyalondelapo. Inge uji mu Kipwilo, kijitu bulongo, nishi uji na bukikizhi

bwa Kipwilo, bino kyafwainwa kwikala mu Kipwilo. Kabiji utwela byepi mu Kipwilo? Kupichila mukupakana maboko? Ine. Kubika jizhina jobe mu buuku? Ine, mwane. “Konka ku Mupashi umo atweba bonse twabatizhiwa mu Mubiji umo.” Kabiji awa Mubiji, Lesa wamuzhachishe pa Kalvali, wajinga Mubiji wakwa Yesu Kilishitu, kabiji atweba twabatizhiwa mu Mubiji umo na Mupashi umo. Atweba tuji na bukikizhi bwa Peenape kikulu tuji mu Mubiji wa Kilishitu, kafwako kyakonsha kwitwabanya ne, kafwako kintu kya kwitukwata ne. Inge waya pangye, obewa ufumamo pa bunke bobo. Bino byo kiji kyakine, inge obewa uji mu Mubiji wa Kilishitu, kine byonka Yesu byo asangukile kufuma ku bafwa, ne obewa ukasanguka pamotu. Lesa wauba kala kyokyo. Aye. . .

³⁸ Kechi wakonsha kulenga mambo ne. Oo, uuba. . . Nakonsha kwikala ndengamambo ku meso obe, pakuuba inge Amiwa nji mwi Kilishitu, Lesa kechi wikimona ne, mambo bubi bwanji bumfuta. . . Mashi Anji anfuta bubi bwami. Mwamona? Amiwa kuuba nalenga mambo ne. “Aye wasemwa kwi Lesa kechi ulenga mambo ne, mambo kechi wakonsha kulenga mambo ne. Awa Lukunwa wa Lesa wikala mwi obewa.” Mwamona? Aye, winengezha kuuba, inge wauba kilubo, kine, ponkapotu winengezha kwisolola. Inge aye ye Mwinakilishitu wakine, aye ukekyuba. Inge wikilama, aye wimwesa mba kechi uji na kintu nangwa kimo ne, mu kifulo kitanshi. Abyo ibyo. Aye kechi uji na kintu kimo ne, kya kutatwilapotu. Bino inge aye Mwinakilishitu wakine. . .

³⁹ Ponkapo, wabyala lukunwa wa wichi mu mushiji, kimyetu kyonse ukekala ke lukunwa wa wichi. Seku ikekala konka, kabiji ne bikwabo byashala, bino aye ukekala lukunwa wa wichi kikulu waimana. Abyo ibyo? Kabiji inge muntu kine wasemwa ku Mupashi wakwa Lesa, aye kechi wikala mukachi ne pangye ne, kabiji wabwela kunyuma ne kulutwe ne, kabiji kuyatu mwaya ntanda ya panshi ne muno. Ine, mwane. Ine, ine. Obewa kechi wi luseku juba jimo kabiji waikala lukunwa wa wichi juba jalondelapo ne. Lesa kechi uji na byo byo mu bujimi ne. Ee, mwane. Inge wasemwa ku Mupashi wakwa Lesa, obewa wi Mwinakilishitu kufuma pakyokya kimye poso. . . poso wafumapo waya, kabiji pano obewa—obewa ke wi ubula kufwa, uji na Lesa. Abyo ibyo, inge uji mu Kipwilo.

⁴⁰ Pano, pano twayai twambe ku lubaji lwa lufu. Pano, kyakonsheka byepi muntu uji byo bya, uji mu yewa musango, kwikala wakolwa? Mambo a kuuba mba awa mubiji kechi wakikulwa ne. Mubiji obe kechi wakikulwa ne. Nangwatu wikale byepi, wikale wawama byepi, kabiji wazhijikwa byepi, kabiji wazhila byepi, kabiji Mupashi Wazhila avule byepi, ao ke mweo obetu. Kabiji mweo obe kechi wakipwijijika ne. Ukijitu na Mapesho, mulaye wakwa Lesa, ao ye waikala ke luketekelo kwa lupulukilo lwetu. Pano bino inge kechi tuji na luketekelo lwa

lusanguko lwetu ne, kwabula lubuko lwa Bulesa, nanchi Amiwa kechi kekala na luketekelo ne inge kafwako kyakushinikisha kwi amiwa mba kuji lusanguko.

⁴¹ Kijitu pamo nobe inge Kilishitu wabula kwikala mu muchima wami, inge Nakonsha kwikisenda kufuma ku musango umo wa—wa milanguluko ya maana a kunyuma kwine, nafwainwa kuketekela pantu pamo byobya, kyawama, nanchi Na—Na—Nafwainwa kwikala wa kwikizhinauko pacheche. Kabiji ao oene mambo, amwa mu Africa, inge baiya, kwaiya bamishonale, baletelenga biumbi bya bene bena kyaalo, kabiji batolelenga tundoli tucheche twa mateshi ne bintutu bikwabo, ke mambo akuuba mba baumvwatu lubaji lwa bumuntu bwa Baibolo. Abyo ibyo. Kabiji ne kipwilo kyami amiwa mwine kya Baptist, Methodist, Presbyterian, bonse bayileko kokwa. Bino byo bamwene bulume bwa Lesa bwaiya na kwimweshwa, akyo kyapwishishe byonse, bayukile ponkapa amba Lesa ye Lesa.

⁴² Bino, pano, kika kitatula iye misongo? Pano, kintu kitanshi, ke mupashi kasa kikyanyge kwikala ke musongo, kijitu pamo nobe obewa byo wajinga mupashi kasa ukyangye kwikala muntu. Pano Amiwa nsakusenda Mulongo Willett kuno kwikala kyakumwenako. Mulongo Willett, Ami... Kwajingapo kimye kimo obewa ne Amiwa kechi twajinga kintu nangwa kimo ne. Kabiji pano kintu kitanshi, Lesa witupele bumi. Kabiji twayai tusende, kwamba mba, inge Nasenda mubiji wenu mute uno, obewa walengwa ku jibumba ja maseezi, akwatakana pamo na ma atomu. Kabiji pano, juba jimo aa ma atomu akonaunwa, inge Yesu wabanda kwiya. Obewa ukabwela kunyuma. Akekalatu nobe byonka byo ajinga ku ntendekelo, kubwela mu lubesha. Pakuuba umvwe mupashi obe wabwela, aa ma atomu akabungakana pamo na yuwe mupashi ne kuleta Mulongo Willett byonkatu byo ajinga, ukekalatu mwanyike, byonka byo ajinga pa buwame bwanji.

⁴³ Inge muntu wapitaila pepi nobe tweti-faivi myaka, utana mikafi icheche mushi ya meso anji, kabiji ne suki yamvwi yatatula kwiya. Kikekala byobyo, mambo lufu lubena kukulondela panyuma yobe. Kabiji juba jimo lukakusenda. Nangwatu wikale ng'anyi, lukakusenda. Bino pacheche pacheche... Obewa ukafika mu koono mumwe, kabiji Lesa ukakufumya mu yewa koono, kabiji obewa ukafika mu yuwe koono *papo*, lufu lukekala pepitu kukusenda, kabiji kululwe lubaji, bino pa kupitapo ka kimye lukakusenda. Bino pano, lufu byo lwakonsha kuuba, lufikizha kimye kyalo, kabiji pano pa... inge lwauba byonse byo lwakonsha kuuba... Kimye Lesa kyo akupele bumi, kabiji wajinga pa bumi bobo bwakila kuwama, pepi nobe pa tweti-fiili, umvwe waiya mu lusanguko obewa ukabwela nobe byonka byo wajinga kimye kyo wajinga myaka tweti-fiili, tweti-faivi, lufu kasa lukyangye kufika. Lufu lukooba

biji byonse byo lwakonsha kuuba. Lwafika momwa, bino obewa ukabwela jibiji byonka byo wajinga.

44 Pano, inge umu wa oa—wa oa maseozi enu mu mubiji, twayai twikitwaleko palutwe, obewa waiya seo pa seo, seo pa seo, kabiji wikitula kuno ku pulatifomu, kulondela seo uji yense mu mubiji, obewa ukekala ke ka kishi kamo kacheche apo po watatwijile, kechi kakonsha kumweka na jiso ne. Obewa wafwainwa kutala mu mangalashi abaisha bintu. Amiwa namonapo ka kishi ka bumi mu maikolosikopu. Kamweka nobe ka muzhinge kacheche. Kabiji kintu kitanshi kitatula ke longololo, kekala nobe ka kintu kacheche kobakasa. Ako ko katanshi ka seo kacheche kanungakana peulu ya seo mukwabo.

45 Pano, inge Nakonsha kutola seo umu mucheche yense mwi anweba ko mwafumine, kamo kaseo kacheche, kakishi. . . Ka kishi ko kaka? Ka kishi ke kakintu kacheche kakepesha, ka seo kakepesha. Kyawama, kika kilondelapo? Pano, Nakufumya ku kibese kyobe kyonse, kufika ne ku kako ka seo kakacheche, kabiji kechi Nakikutana ne. Natanatu ma seozi obe atulwa. Kyawama, pano, kintu kyalondelapo, maseozi alenga mashi, kabiji ne maseozi alenga misunyi, kabiji musango yense mu byaikela, byalala patoka papo, bino Amiwa kyangye kukutana ne. Pano, Amiwa nafikatu ku kakishi kamotu. Kyawama, Amiwa nsakwabanyapo aka kaseo kamo kacheche. Pano, obewa ujipi? Bumi bobbe. Kabiji bumi bulenga seo mutanshi, ako kaji ke kakishi, pano palondela kintu kyonse mwaila musango wakyo; kabwa pa kabwa, kang'onyi pa kangonyi, muntu pa muntu. Maseozi abena kukoma, seo pa seo, seo pa seo, kufika ne pa byo uji, bu muntu, bubena kukomesha maseozi. Bino, akya kyatongwejilwe jimo kwi Lesa kwikala muyewa musango.

46 Bino, pano, nga kaasa? Twayai tumwambepo pachechetu. Pano, Lesa wakupele bumi bobbe. Kabiji ne kwamba mba, obewa uji papo leelo, Amiwa jipano, kuji—kwafwapo kijipo pa kuboko kwami ne, bino pakonsha kwikala kaasa pa kuboko kwami kimye kimo. Kyawama, awa kaasa wayishilepo byepi popa? Twayai tumone kana awa kaasa ye muka, pano twayai tumusataule, twayai tumulonde. Bino, aye ke mulumba wa maseozi, ne aye. Bushe mwikiyuka nyi? Kitumbwa, kabale, kyonse kya byobyoby bintu ke maseozi. Kechi bijipo na musango wamwekelo ne. Bino bitabataba, kabiji bikwabo bimweka nobe tangatanga, kabiji bimo bimweka. . . biya mubulepelepe, kaasa uchila, pamotu nobe mizhinge ichila yalepuluka ipita mu. . . Kabiji kuji kaasa wa bujiluba ao wiya bimye byabaya pa jibele ja mwanamukazhi, bijitu pamo nobe tuba shinkwa twa mambazi twatetakana kamo pa kakwabo, kabiji bitatula kusalang'enamomo. Kabiji bikoma kuya monse monse.

47 Bimye bimo bitumbwa bikala byalepuluka, *yuwe* musango, byalepa, bya bulung'ana, kabiji ne biji byonse. Abyo kechi biji na musango wamwekelo ne, mambo byapasha mupashi

wabula musango wamwekelo. Bino ke nkomeno ya maseozi. Ke jibumba ja maseozi, kwamba mba, mwi obewa ponkapano muji kitumbwa nangwa kaasa, maseozi abena kuvula, na kukoma, na kukoma, na kukoma. Abena kuja, na kwamwa bumi bobo. Byaikala bumi monka mupichila mashi. Kabale kasenda meema a jiso kabiji enda kakoma na kuzhikapo, ke ke zhikepo ako keene, ne kumvweta meso obe onse. Bimo biiya kabiji kechi byuuba. . . biji nobe kikola kya mapwapwa, akyo kiya nobe kakishi kakacheche. Kechi kajipo na kipimo kyako ne. Kipimo kimotu kya kakishi kalenga nzovu, kalenga awa—awa kizumbuzumbu. Mwamona? Kechi kiya na kipimo kya kakishi ne.

⁴⁸ Kabiji bimo bisenda musango wa mubiji, bikwabo kechi byuba byobyo ne. Kabiji bimo kechi biya mu maseozi ne. Bimo bikalatu ke mipashi, imanyika mweo. Tusa kweseka kutola lolu lubaji, Nsakusha alo lubaji ke lwa keesha mabaanga, inge Nakonsha, kwepi kufuma awa mupashi-wa mweo, kabiji wikala byepi mumwe *mushi*.

⁴⁹ Kabiji pano, balunda, Amiwa kechi mbena kwamba kikye mwaila musango wa saikoloji ne. Amiwa naingila na bademona pa myaka yavula, kabiji anweba mwayukatu kyokyo. Inge anweba mwayuka bibye bintu, pakupwisha kupwila mu bufuku, bintu kyubiwa bimye bimo. Obewa kechi wayuka ne. Vulukai, inge wakumanya mupashi, kyawama wayuka kyo ubena kwambapo. Kechi wakonsha kwimanatu popa na kutwajijila ne, mambo kechi kisakuubapo kyawama nangwa kimo ne. Pakuuba inge demona wafwainwa ku nkukokela, aye ukekiyukatu. Kechi kiji mu kubijika ko ubijika ne, kechi kuvula kwa manyi o ubikapo ne. Kiyila kiji kunyuma kukwe kyo ayukako, Bukine. Yesu waambiletu kwi aye mba, “Fumamo.”

⁵⁰ Vulukai, banababwanga bapaachilenga ne kuzhobakana, na kweseka kumupangamo, kabiji ne byonsetu. Baambile mba, “Kika kyo twakakelwa ku mupangamo?”

Waambile mba, “Mambo, kubula luketekelo lwenu.”

⁵¹ Waambile mba, “Fumamo mwi aye.” Awa nsongwalume waponene panshi kabiji wazakamine kyabaisha bingi. Mwamona? Mwamona? Abo bamona luusa.

⁵² Monai pa booba bansongwalume kokwa, babyubilo byatama bamwene Paulo na kupangamo badiabola. Abo baambile mba, “Twakonsha kuuba kintu kimo,” baana bakwa pulisiti. Nanchi baya nakwamba mba, “Twakonsha kupangamo bademona.” Byubilo 19. Bayile konka ku mwanamulume wajinga na kashita, kabiji baambile mba, “Twakupanga obewa, mwi Yesu. Fumamo mwi aye. . .” Aye diabola waambile mba, “Pano. . .” “. . .mu Jizhina ja Yesu, Ao Paulo ye asapwila!”

⁵³ Aye diabola waambile mba, “Bino, Namuyuka Yesu kabiji Paulo Namuyuka, pano obewa yobe ng’anyi?” Mwayuka kyamwekele. Watolokejile pa mwanamulume, ne kwi batabawila

bya kumvwala byabo, kabiji abo boonka baikele na kashita, ne kunyemena mu mukwakwa.

⁵⁴ Aba bademona bamo kobaji ne leelo, nanchi kuji kisangajimbwe kyabaya bingi. Akye ke kipwilo, mabaanga ano. Kuji kisangajimbwe kyabaya bingi mu ntanda leelo, kitelwa mba lubuko lwa Bulesa, abyo byafwainwa kwibilekesha. Akyo kyo kileta myendeleko ku ene Mambo. Akyo kyo kwaikela kushupikwa kwabaya bingi. Kuji bintu byavula bitelwa mba bupopweshi, leelo, byafwainwa kwibilekesha. [Kafwapo bijipo pa tepu ne—Waku.] Kafwako bijipo ne kanatu bupopweshi bwabubela! Akyo kyo kilengela Kipwilo kyakine kya Lesa kwikala nalukatazho lwabaya. Bino atweba twi America, monai, ajo jo jishinda ja kwikelamo. Lesa waamba mba lekai wichi ne byatabakana kabiji ne seku bikomene pamo. Kechi mweseke kwibiyokola ne. Bilekai bikomene pamo, bino konka ku bipangwa byabyo ko mu kebiyukile. Kechi kujipo bipangwa ne, kika, kechi mujipo Bumi ne, kafwamo nangwa kimo kijimo ne.

⁵⁵ Pano, monai yuwe seo. Twayai twambe, nobe kya kumwenako, nobe bimye byavula, kaasa uchila javula ufikila munda mwa mwanamukazhi, kukwesululwa kwa bwanabukazhi ne bikwabotu. Pano byo kiji, twayai tusende kyokyo, awe mulunda panshi, pa seo wanji, awe—awe kaasa. Pano kaasa. . .

⁵⁶ Bintu byonse bya bu mubiji byapashang’ana na bya bu mupashi. Bushe mwayuka kyokyo nyi? Bintu byonse bya ku bu mubiji byapasha bu mupashi, nangwa kikale byepi.

⁵⁷ Nobe kyakumwenako, kiji bibye, inge—inge twasemekwa mu Mubiji wa Kilishitu, kuji bintu bisatu bifumamo mu kuleta Kusemwa kwetu. Kabiji bintu bisatu byafuminemo mu bumi bwa Kilishitu kimye kyo Afwile. Mwafumine mu mubiji Wanji, meema, Mashi, Mupashi. Abo ibyo nyi? Bintu bisatu, abyo byo bintu byo tupitamo inge twasemwa jibiji: kulingishiwa, kutokeshiwa, lubatizhilo lwa Mupashi Wazhila. Bino, abyo byonse byakonsha kwikala mu kyubilo kimo. Bino kisenda. . . Bino wakonsha kwikala mumusango wa kulingishiwa kwakubula kwikala watokeshiwa ne. Obewa wakonsha kuketekela mwi Nkambo Yesu Kilishitu kabiji kasa watwajijila na bubi bobo. Bino wakonsha kine kwikala mu byonse bibiji kulingishiwa kabiji ne bumi bwatoka bwazhila, bino kwakubula Mupashi Wazhila ne. Monai, Baibolo, Mutamshi Yoano 5:7, waamba mba, “Kuji basatu baikala na bukamonyi Mwiulu, aye Taata, Mwaana, ne Mupashi Wazhila, kabiji. . . Taata, Kyambo, ne Mupashi Wazhila,” ao wajinga Mwaana, “kabiji ne babo basatu ke umotu. Kabiji kuji basatu bapana lushimuno pa ntanda, meema, Mashi, ne Mupashi, kabiji baswang’ana mu kimo.” Kechi biji mu kimo ne, bino bitabazhanya mu bu umo. Obewa kechi wakonsha kwikala na Taata kwakubula kwikala na Mwaana ne; obewa kechi wakonsha kwikala na Mwaana kwakubula Mupashi Wazhila ne,

mambo kechi bakonsha kwabenamo ne, umotu. Balesa basatu baji mu umo.

⁵⁸ Amiwa kechi ne kyumvwapo kuno ne, bino muvwa byavula mwaya kyaalo, kintu kimo kyabaya mu mabumba aba Pentekosito, ke kulubakana mu kyokyo kintu kimo kyapelatu. Kabiji Nakikajikapo mitwe yabo pamo kabiji ne kushinikisha kwi abo bonse babiji amba baitabilatu kintu kimo. Ke diabola uji pakachi kabo, byo byonka. Inge akya kipwilo kikatampe kya Pentekosito kyakonsha ku- . . . ne kwibitaya abya bicheche, bisho byakala ne kukwatakana pamo abo bene mu Kipwilo kimo kyapeshiwa kyakwa Lesa, Lapicha wakonsha kwiya. Bino kikulutu Satana wakonsha kwibabanya, kijitu bulongo. Ajo jo jishinda janji ja kwikyubilamo. Kabiji abo kine baketekela kintutu kimo.

Umo waamba mba, “Kyawama, *akye* kyo Kyokya.”

⁵⁹ Naambile mba, “Kyawama, inge akye kyo Kyokya, nishi Akya kyo *kikye*.” Nanchi byobyoy kiji. Nanchi, ke kintutu kimo. Bino abyo byokiji, mu bobwa busatu bwa bu Lesa. Pano, bino, Lesa mu bu umo Bwanji. Lesa Taata, Mwaana, ne Mupashi Wazhila. Bino, kechi twaamba mba “balesa betu ne,” nobe bantushi. Ke “Lesa wetu.” Mwamona? Ke kusololwa Kwanji pasatu kwa bu Lesa.

⁶⁰ Pano monai, pano, Satana uji mu basatu ne aye. Kabiji bulume bwanji buji mu basatu.

⁶¹ Pano, bino monai inge meema, Mashi ne Mupashi bileta Kusemwa kupya. Abyo ibyo nyi? Pano monai. Abyo byo byaimenako Kusemwa kupya. Kika kimenako kusemwa kwa ku mubiji Kusemwa kupya kasa kukyanye kwiya? Kimye. . . Anweba bainetu, inge mwaana wasemwa, kintu kitanshi kika? Meema. Kyalondelapo, mashi. Kyalondelapo, monai, kyaleta muntu. Meema, mashi, mupashi.

⁶² Pano, kaasa, twayai twingile nanji nobe kyalondelapo, tuji pepi nobe mamineti faivi ashalako, Naketekela, pepi nobe mamineti faivi asakulondelapo palutwe, twayai twingijile pa kaasa. Awe mulongo ye muka? Ing’anyi kintu kyo emenako? Aye uja bifwila. Aye waimenako kikolo, uja bintu byafwa. Kabiji kaasa ufuma pa kwikozha, javula, apo seo po akozhiwa kabiji wabwela wa—walajika. Kabiji kaseo kakacheche kafuma mu kifulo. Oo, akyo ke kyambo kikatampe bingi kwi Baptist, kechi ibyo nenyi? Kijitu bulongo, bino ufuma mu kifulo kyanji awa seo. Amiwa ne Baptist waketekela mu kufuma mu kifulo kyanji.

⁶³ Muntu umo waambile mba, konka kuno ku mbung’eno ya ku Arkansas juba jikwabo, waambile mba, “Mulongo Branham,” waambile mba. . . Kyajinga ke mulongo wa ku Nazarene. Aye wabukilwe. Aye wajinga na. . . wailengatu na kwenda mu tauni, na minkombo yanji pa kipuzhi. Aye waambile mba, “Mwayuka kine kintu nyi?” Waambile mba, “Kimye kitanshi

kyo Naishile kuno,” waambile mba, “Na—Nalangulukile mba obewa . . . nakumvwine kusapwila, Nalangulukile mba obewa wi Nazarene.” Aye waambile mba, “Pano Namwene bantu bavujijilemo ba ki Pentekosito, kabiji muntu umo wambuujile mba obewa wi Pentekosito. Kabiji pano waamba mba wi Baptist.” Waambile mba, “Amiwa kechi ne kyumvwa ne.”

⁶⁴ Naambile mba, “Oo, akyo ke kintu kyapeela.” Naambile mba, “Amiwa ne waki Pentekosito Nazarene Baptist.” Nanchi akyo—akyo byo kiji. Kijitu bulongo. Ine, atweba twi umo mwi Kilishitu Yesu, konka ku Mupashi Wazhila kasa abena kwitulengela kwikala umo. Abyo ibyo.

⁶⁵ Pano, monai, awe seo mucheche ufuma mukifulo inge waikala nakikozha. Kitatula pacheche. Tukwabo tubishi twanyemenako na kupana bumi bwato. Kabiji akyo kyo kilengela manakazhi ayiya pa kilonda. Atwa tucheche tu bashilikale tubena kulwisha bumi bobo. Tunyemenako na—na konauna abwa bulembe, abwa bulume bwa bademona bubena—bubena kubungakana pomo, na kupana bumi bwato. Akyo kyo kilengela . . . Akyo . . . Ke jibumba ja bashilikale babacheche bafwa, aa manakazhi aji mu mashi obe . . . aji pa—pa kilonda, bapana bumi bwabo pakuuba mba obewa wikale na bumi.

⁶⁶ Pano, inge ka seo kamo momwa kabula kuswa nishi awe demona watatula, utatula kukoma, utatula kuvuzha maseozi. Aye ubena kushimika mubiji pamotu nobe byonka baana benu byo batatula mu munda, kabiji pamotu nobe byo waubile munda mu bainobe. Seo pa seo mukwabo, seo peulu ya seo mukwabo, seo kyatwajijila, muji monse, monse monse; bino, kechi bajipo na musango wamwekelo nobe byonka biji muntu ne, monka mwaila musango wakyo. Kikala kyafuma mu mupashi. Kikomatu muji monse, kabiji kitatula seo peulu ya seo, seo peulu ya seo.

⁶⁷ Kabiji pano, kintu kitanshi mwayukatu, mukatatula kumvwa kukooka kabiji ne kumvwa kukolwa. Obewa waya kwi badokotala kabiji wakupima. Kapepo kechi wakonsha kwikitaana ne. Inge aye wikitaana, kapepo wakonsha kwi kichiba. Inge wakonsha kwi kichiba bulongo, kijitu bulongo, aye uji nakyo. Bino inge kechi wakonsha kwi kichiba bulongo ne, nanchi inge kiji pa kikulomeno nangwa pantu pakwabo po kyakonsheka kubulwa kuchibiwa bulongo ne, kamo kalubaji lwako kashala kakatwajijila nakukoma. Monai, mambo kechi byo kiji ne, nobe wachiba kuboko kobe pakuuba mba kipwe, nangwa kiji kyonse, nangwa wi kichibako . . . Kyo Nalumbulula ke kino, inge wakonsha kuchibako mwine mubiji, ne kushako kuboko kobe konka, kika, kechi kwakonsha kwikala na bumi ne. Bino—bino, monai, akyo kechi kiji na musango wa bumi nobe byonka byo muji ne. Ke bulume bwa demona bubena kwenda.

⁶⁸ Kabiji pano monai, mwibitela, ba dokotala bekitela mba, “kaasa.” Lesa wikitela mba “diabola.” Talai buleelo. Abo

bekipa . . . Kyambo kya *kaasa* kyafumine kwepi? Kyafuma ku . . . kufuma ku kyambo kya ki Latini akyo kingijishiwa mu mulaka wa michi, kyalumbulula mba “lukala,” lukala ye mumona mwaya kitulu kya kalunga, uji na mikupa yavula. Ajo jo jishinda jo—jo kyubilamo, kiyatu monse, kisalang’enatu monse monse. Kyambo kya *kaasa* ke “lukala.” Kabiji kitwela mukachi na kukwachijila kabiji kasa kitoma mashi monka mo kiyiila, nobe kimbalang’eze nangwa kintutu kimo. Kika, kitumbwa, kabale, kabiji ne bikola bikwabo, byonsetu bifuma ku kakishi, ne kooka kakishi kafwainwa kwikala na mubiji. Kabiji kasa kikyangye kwikala mubiji, kyafwainwa kwikala bumi. Kasa kikyangye kulenga nangwa—nangwa kumena kabiji ne kulenga maseozi avula ne, kyafwainwa kwikala bumi. Akyo kyalumbuluka? Pano, kwepi kwafumine yewa kaasa? Ng’anyi, akya kyafumine kwepi? Kechi kyajinga pe obewa kimye kyapita ne, bino kapepo kasa kiji pe obewa. Kyafumine kwepi? Ke bumi bukwabo bwapusanako na bumi bwenu, bwaikala mwi obewa. Kabiji ke kya ku kumanyika, na kwaamwa bumi bobbe. Ao oene mambo Yesu kyo ekitongwejile mba “diabola.”

69 Batela kashita leelo, baamba mba, “kashita.” Kika, kashita, mu Baibolo, Yesu wi kitelele mba “diabola.” Kimye mwanamulume byo ayishile na nsongwalume waponene panshi, ne kafulolo kalupuka ku kanwa, kabiji ne bintu byonse, aye waambile mba, “Uji na diabola, kabiji bimye byavula kimutaaya mu mujilo, mu meema.”

70 Pano bawamishe jizhina janji ne kumutela mba kashita, bino kasa aaji diabola. Kabiji Yesu waambile mba, “Obewa diabola, fumamo mu mwaana!” Kine. Bino, kashita javula kafuma ku lukatazho lwa jifyo. Kapepo twakonsha kutwela mu kyokyo palutwe kacheche. Mwamona? Kilengela kashita, kufuma ku kisukulwilo.

71 Pano, monai mu kikyeye, nanchi awa seo wikala popa, ke diabola. Aye ubena kushimika bumi; ubena kukoma, kuya na kubaya na kubaya. Aye uji na mwingilo umo wa kuuba, ao, ke kusenda bumi bobbe. Akyo kyo kyamutumijile diabola, kwiya na kuchibako mooba obe pa sebete.

72 Bino, Amiwa nasachila dokotala yense. Ee, mwane. Yense sayaasi wa michi, Lesa ebapeshe pa bukwasho bonse bo baubila bantu. Akyo kine. Mwakonsha kuuba byepi mu ntanda leelo kwakubula kikyeye ne? Nasachila Lesa pa mambo a sayaasi wa michi. Nasachila Lesa pa motoka uji yense. Inge Lesa kechi waswishishe sayaasi kulenga motoka wami ne, Kyafwainwa kwikala kyankosela kwenda kwiya kuno. Mambo a kyeya kya malaiti, ne sopo wa koowesha maboko ami, ne muchi wa kusukunshila meeno, kyakine. Namusachila Aye pa bintu byonse, mambo bintu byonse byawama bifumamo kwi Lesa.

⁷³ Bino lekai ne mubuule, kechi kujipo muchi nangwa umo wakonsha kubuka kikola kiji kyonse ne. Kabiji kechi kujipo nangwa umo dokotala, kanatu inge kechi walumbuluka ne, bino dokotala wakine ukakubuula mba abo kechi baamba mba babuka ne. Ponka pa Balongo bena Mayo, bavula ba mwi anweba. . . Amiwa naikalapo na misambo ya mepuzho ne mikumbu kokwa, jibiji nangwa jisatu. Pa balwazhi bafuma kokwa, babula kubukwa. . . Anweba tangai *Lindazi Daingesiti*, pepala wa mu Kapande? Baanga batangile pepala wa mu Kapande, sawakya wami uji momwa, mu *Lindazi Daingesiti*? Mwamona? Kabiji bangichile amiwa kokwa, pa mepuzho ne mikumbi ya pa mwaana ye bakakelwe. Baambile mba, “Kechi kyakonsheka kubiwa ne.” Bino Mupashi Wazhila waambile kwi amiwa kabiji wambujile byo kikekala, kabiji byo kyaubiwe. Kijitu bulongo. Bino, ba bangichile konka kwa. Kabiji ponka pa kibelo pajinga Jimmy ne bakwabo, Mayo watanwanga ponkapa, paji kiyukilo kikatampe bingi kyaamba mba, “Atweba kechi twamba mba tubuka ne. Twambatu mba tukwasha bilengwa na lesa. Kujitu umo Ubuka, ao ye Lesa.” Abo bo bashinda pa kyaalo kya panshi. Bino, tuji na bacheche babula kulumbuluka, ee. Abyo ibyo. Tuji na bamo basapwishi babula kulumbuluka, ne abo. Kijitu bulongo. Nanchi, akyo kitanwa ku mbaji yonse ibiji.

⁷⁴ Monai, muntu yense waamba mba ne ubuka, aye ke wa mashimikila, mambo kechi wakonsha kwikyuba ne. Mambo Baibolo waamba mba, “Amiwa yami Yehoba wimulekela mambo enu onse kabiji ne kubuka bikola byenu byonse.”

⁷⁵ Amiwa ngya na kutanga. Mu kibamba kyami, aye. . . bamo madokotala bawamisha mwaya kyaalo beya. Anweba kechi mwayuka biji kunyuma ya bumi ne, mulunda, kuyuka byajingako, kabiji ne bintu byo Mbula kwamba mu jibumba. Bantu beya kumbaji. Kabiji kechi mulanguluke mba ba Nikondema bavula bafwako mu ntanda pakino kimye ne; kine koobaji, biumbi bya ba mwiabo. Abo batala pa kyokya kabiji baiya mu pwijilo. Baikala byobya kasa bamvuala Si-kipa, nangwa kintu kikwabo kiji byobya, na mazhina anengela bulongo akonsha kwimulengela kukumya, ne kwikala monka mu pwijilo. Mu moba acheche baiya kwabuke, kabiji batuma muntu umo ku misambo ya mepuzho ne mikumbu. Kabiji ne kwamba ponka pano, amba, “Mulongo Branham, Naketekela mba Abo bo Bukine.” Ne abo bantutu byonka byo tuji. Kine. Kabiji muntu yense ubena kukeba kutala kubushiya bwa kipembe kya fishi kyo afwainwa kupitamo juba jimo.

⁷⁶ Bino ao makaasa ne bibye bikwabo bintu kyakine badiabola balengwa mu bu mubiji wa nyama ne mashi, kasa bibena kwenda, na kusenda bumi bobo.

⁷⁷ Pano, inge Nakonsha kuuba nobe dokotala, inge Nakonsha kwikichibako, ne kwikibika panshi. . . Nangwa, pamo nobe, kwamba mba, nobe kyakumwenako, obewa wajinga kaasa,

obewa mwine, pa ino ntanda. Pano, alwe ke lubuko lwa Bulesa. Inge Nakeba kukufumyapo mu jishinda jakwa dokotala, Nakonsha kulama. . . nafwainwa kushitaula mubiji obe, nangwa kintu kimo kikwabo, poso kyazhimang'anapo pantanda. Kechi kyakonsha kwikalapo jibiji ne, pamo nobe dokotala byo afumyapo akya kitumbwa pe obewa. Bino mu musango wa lubuko lwa Bulesa, inge wajinga kaasa, Nakonsha kufumyamo bumi bobo mwi obewa, kabiji wakonsha kutwajijila. Bumi bobo bwakonsha kufumamo mwi obewa, bino mubiji obe wakonsha kwikalako byonka byo ajinga.

⁷⁸ Pano, papo meso ne kimye ke mulwanyi wa Lesa wabaya bingi mu lubuko lwa Bulesa. Amiwa kechi nayuka ne kana Mulongo Baxter ufika ku bibye bintu mu mpwijilo. Amiwa ngikala panshi, ne kulondolola kwi aye ne Mulongo Bosworth, jikwabo ne jikwabo. Bino kikye kyo kyubiwa. Nazhinauka kana bantu bavula bekyumvwa, mambo, pa kupitapo ka kimye, mutaana bantu kebabwele jibiji, na kwamba mba, "Najinga na lubuko lwami, Mulongo Branham, pa moba abiji nangwa asatu, bino, Lesa apeshiwe, kya—kyafumine pe amiwa." Kabiji Ne kitana mba, kabiji Ndanguluka mba kechi bekalu bulongo mu mbung'eno ne. Bantu kechi bekyumvwa ne. Naikalapo na bantu baiya ku pulatifomu kasa baji bampofu bene bene, bakaasa, nangwa kabale pa meso abo, kabiji batanga yuwe Baibolo panyuma ya kulombelelwa, ne kwenda baenda; mu fiili nangwa foolo moba babwela baikala bampofu nobe byonka byo bajinga pantashi. Kika kiamwekele? Uji yense wayuka mba inge bumi bwafumamo mu mubiji uji yense, upumbako pa kimye kicheche. Abyo ibyo nyi?

⁷⁹ Uji yense, muno, waipaya diyala, nangwa ng'ombe, nangwa kintu kiji muyewa musango? Kine. Kijitu bulongo. Mwamupima bufuku bunu, anweba bafunji muno, balunda naami. Anweba mwaipaya diyala mwamutaya ne pasikelo, ne kubuula bansongwalume kinemenezhi kyaji. Tajishaitu! Mu kimye kya lukeelo ukekala wapeela na mapaundi avula kukila ne byo ajinga. Inge muntu wafwa, kalama wa saine, kintu kitanshi, usenda meno abubela nangwa jiso, mu musango ye ajimo, wibifumyamo; mambo, upumba, bikalupukamo mambo mubiji wa muntu upumba. Mubiji yense wa nyama ne mashi upumba. Inge bumi bwafumamo mu seo, utatula kuya panshi, na kupumba. Kikobiwa byo byo pa ma awala sebetu-tuu. Kabiji pano po akatatula kuvimba. Lekai kabwa mucheche bamushone, mu mukwakwa. Lekaitu ekale ponkapa pa juba pepi nobe moba fiili, kabiji pano mukamone byo kyubiwa. Aye ukekala ke kabwa mukatampe kukila ne byo ajinga. Uvimba. Abyo ibyo nyi?

⁸⁰ Kyawama, akyo kyo kintu kimo kyubiwa inge awa—awa demona wapangiwamo mu muntu wakolwa. Moba acheche atanshi, "Oo, Naumvwa bingi bulongo." Pano watatula kwamba mba, "Amiwa—Amiwa nakolweshu kukila byo Na—kukila byo

Najinga. Nataya lubuko lwami.” Kabiji byonka lwitabilo byo lwikifumishemo, kubula lwitabilo lwi kibwezhamo jibiji. Nobe byonka lwitabilo byo lwikipaile, kubula lwitabilo lwikisangula. Yesu waambile mba, “Umvwe mupashi watama wafumamo mu muntu, uya na kwendauka mu mampuzha mwauminina kabiji ubwela ne jikwabo na bademona bakwabo sebeni.” Kabiji inge muntu wawama mwina nzubo kechi waimana popa na ku kikizha kibelo ne, ukabwela jibiji watwela. Kabiji muntu wawama wa nzubo yenu ke lwitabilo lobe. Kwaamba mba, “Fumaimo!” Abyo byokiji.

⁸¹ Pano anweba monai mulwazhi watambula lubuko, mwailatu ndoonda, kana kyaikala kyakukumya kikatampe. Kyakuuba mba, lubuko lwa Bulesa ne kyakukumya ke bintu bibiji byapusanako. Lubuko lwa bulesa, kintu kimo; kyakukumya ke kintu kikwabo. Bino ndonda ya lubuko lwa Bulesa, inge mupashi watama wapangiwamo, diabola kaasa, inge wafuma mu muntu, “Oo!” Pano, nangwa kwamba mba tusakusendapo kintu kimo kibena kumwekanyika, Nsakwamba mba, kabale. Kika kyamwekele umvwe awa muntu. . . Inge mwakonsha kumona muntu mpofu. Amiwa kechi nayuka ne kana Naikalapo na umo muno nangwa ine, nangwa byonkabyo, meso aji na kabale. Amiwa ne baleka baimanako pa mamineti acheche. Kika? Pakuuba mba kupumba kwatatula kumweka. Wibabuula mba ba bwelele, betupe lushimuno. “Oo, ami!” Bakonsha kumona bingi bulongo. “Oo, ami! Kiji, nobe Mbena kumona bintu! Ee! Ami. . .” Lukatazho lwepi? Bumi bwafumamo; mubiji wa kabale ubena kupumba. Kyawama, kikooba byo byo pa moba avula. Nkwamba mba, “Oo, Amiwa mbena kumvwa bingi bulongo.”

⁸² Kabiji pa kupitapo ka kimye, batatula kumvwa mutwe, kechi mbena kumvisha bulongo ne. Wabuuka lukeelo lwalondelapo, “Natatula kubula kumona ne jikwabo.”

⁸³ Bamo ba mwiabo baambile mba, “Uu-uu, obewa wilengejiletu kyabubela. Aja jibumba ja booba kyongo-kyazhila bo balengeletu kyabubela.” Kechi muketekele kyokyo ne! Abo ke bubela bwa diabola. Inge waketekela kyokyo, ukabwela jibiji mu bu mpofu.

Bino inge wakwachijilatu, ne kwaamba mba, “Ine. Nkambo, Naketekela.”

⁸⁴ Pano kika kimweka? Awa mubiji uvimba pa kimye kyabaya. Kyamvweta pa meso jibiji. Awa kaasa pa mubiji ukavimba. Kikatapa jibiji kukola ne kubabana. Nanchi obewa ukakolwa bingi, ukakolwa kyatama. Kika? Akya kitumbwa kikatampe kya mubiji kiji mwi obewa kasa kyaikala monka, kyafwa.

⁸⁵ Obewa wabwelatu, dokotala kabiji waamba mba, “Oo, amo kechi muji maana ne. Kaasa uji ponka. Nakonsha kwikamona.” Kine, kiji ponka, bino kyafwa. Aleluya!

⁸⁶ Bino, kwenda kwa mashi kwafwainwa kutokeshwa mubiji. Kimye kyonse muchima kyo ampoopa, kitwala mashi mwaya mubiji, kabiji kibena kusenda biko. Kine, kyakonsha kukulengela kukolwa. Pano ibyepi inge wajinga na musunyi wa nyama ubena kupeepela pantu pamo, nangwa walepa nobe muloolo, nangwa kintu kimo kikatampe kiji nobe munwe obe, kabiji kasa kyakoobama momwa, kabiji yajinga yafwa, aya nyama yafwa yakobama mwi obewa, kasa kibena kubola? Kyawama, onkao mambo, mashi obe afwainwa kwikitokeshwa, kimye kyo abena kwenda. Bino kuji mubiji wafwa, kintu kasa kyakobama momwa, mambo bumi bwafumamo mwiakyo. Bulume bwa Lesa, kupichila mu lwitabilo, bwikipangilemo. Aye ke demona; wafwainwa kufumamo.

⁸⁷ Bino, ene mambo, bantu kechi babuulwa ne. Bafumamo, bekileka. Kabiji awa diabola yenka umo waimana ponkapa, wabwela jibiji. Inge Lesa wakubuula kintu kiji kyonse payuwe pulatifomu, kupichila mu Mupashi Wanji, na lutundaiko lwa lumwekesho, kechi wafwainwa kuzhinauka kyokyo ne, inge ne kintu kyatama kikeya pe obewa, Aye byo aambile. Mambo Yesu waambile mba, “Bwikalo bwapelako bwa yewa muntu bukekala bwatama bimye sebeni kukila ne byo ajinga patanshi.” Abyo ibyo nyi? Umvwe mupashi watama wafuma mu muntu, uya na kwendauka mu bifulo byauma, ubwela na bakwabo badiabola sebeni. Nanchi, kechi wafwainwa kulengulula ne. Ikala Nakyo bulongo. Kikajike, kufuma mu muchima obe. Kwaamba mba, “Ine, mwane! Amiwa kechi kasung’ena ne! Nangwatu Amiwa nakolwa byepi, akyo kechi kijipo na kintu nakyo ne.” Nanchi, kintu kitanshi mwayukatu, ukekalanga ubena kutokeshiwa. Bintu byonse bikekalatu bulongo pa kyokya kimye. Mwamona, kyafwa. Akwa—akwa kutumbula dokotala koabile pe obewa, akya kitumbwa kimo kyakikala mwi obewa, kwakubula bumi mwi akyo.

⁸⁸ Waamba mba, “Bumi mukachi kakyoo, Mulongo Branham, bushe kyakonsha kusenda bumi bwami nyi?” Ine, mwane. Abwa bumi ke bumi bukwapo bwapusanako na boobe. Amiwa ne mumweshwa mba obewa wi bumi kabiji wikala ke kintu kyabumi, kabiji ke bumi ne kwikala bwikala ke kintu kyabumi; kabiji obewa wi wa kwa Lesa, kabiji akyo ke kya diabola. Mwamona mo Nekitazha nyi? Lufunjisho lwa pa bademona. Pano, wafwainwa kumona akya kintu byo kimweka inge waimana ne kwikitajisha.

⁸⁹ Oo, ami, Mundekeleko mambo, ke pepi nobe fiili-sate. Amiwa mundekeleko mambo. Talai, balunda. Oo, kika kikebewa ku ino ntanda!

⁹⁰ Amiwa naikala pepi nobe myaka sebeni, nakufunjisha mwaya America, nakwikala na iye mpwijilo ya lubuko. Amiwa njina lutundaiko lwawama lwa kutatula kubwela jibiji na kukilang’anya kyaalo, na kufunjisha Baibolo, kabiji ne pa lufunjisho lwa bademona, bantu byo bafwainwa kukwatakanya

byakuuba. Kabiji ao oene mambo, kyo baila ku iye mpwijilo, bimye byavula, kabiji, mulongo. . . Inge kechi mwakwatakanya ne, bantu balupukamo, kabiji bimye byavula. . .

Pano, vulukai awa mulongo waambile mba wajinga na kyabupe kya lubuko lwa Bulesa? Kyabupe kya lubuko lwa Bulesa kyajinga mwi obewa inge watambula lubuko. Kiji pe obewa, yenka umo. Kya bupe kiji kyonse kingila na lwitabilo. Kabiji nangwa ngikale byepi na kyalubuko lwa Bulesa Amiwa nji nakyo, Nekiketekela na muchima wami yense, bino wakonsha kwimana papo kabiji, inge kechi uji na musango umo wa lwitabilo ne, kechi kyakonsha ku kuubila kyawama ne. Nakonsha kukulombelela, pa maawala ne milungu kabiji ne bang’ondo. Kechi ke basapwishi baji na lubuko lwa Bulesa ne. Ke obewa uji na kyabupe kya lubuko lwa Bulesa, akyo kiketekela kwikala wabukwa, mambo ko kulwitabilo. Ko lwitabilo! Kwingila konse kwakwa Lesa ke kwa mu lwitabilo.

⁹¹ Bya nkondo byonse byakwa Lesa ke bya kulwitabilo. Atweba kechi tujipo na kintu kimo kya mu ino ntanda ne. Bintu byonse bya—bya kipwilo kya Bwinakilishitu ke kyubilo kya lwitabilo. Monai pa bya nkondo bya Lesa: butemwe, lusekelo, mutende, kukoka muchima, buwame, bukimote, butekanye. Abyo ibyo nyi? Byonsetu byakila pa bulume bwa bumuntu, kafwako kya ku mubiji ne. Nanchi kechi tutala ku bintu bya ku mubiji ne, mambo tubena kwingijila ku bulume bwakila bumuntu. Kabiji jishindatu mo twafwainwa kwikela nakyo, ke lwitabilo, ku byo aamba Lesa mba Byabukine, kabiji tutala pa Bibula kumweka. Kabiji tuteela byobya bintu byabulako, amba kobiji; nobe byaubile Abulahama, kabiji wikitambwile. Amena! Abulahama wateelele abya bintu byabulako, nobe Lesa wibyubile, nobe biji konka. Byo ajinga myaka aduleendi, aye kechi wazhinaukile yewa mulaye wa Lesa mu kubuula lwitabilo ne.

⁹² Nakonsha kufwanyikizhatu kyokyo, kechi ibyo nenyi? Monai Sala wabukile lukeelo lumo. Lesa waambile mba, “Abulahama!” Waambile mba, “Abulahama, obewa ukekala na mwaana.”

⁹³ Sala wabukile. Wamwipwizhe mba, “Waumvwa byepi, Sala?” Ajino ke jibumba ja bantu bamvwangakana, bino telekai.

“Kechi pajipo lupusano ne.”

⁹⁴ “Kyawama, lukumo lwikale kwi Lesa, tukekala nanji! Yanga ukasende matebela ne bapinyi, kabiji ne bintu byonse. Inengezhai.”

Kijitu bulongo, ng’ondo mukwabo wapichile. “Sala, ubena kumvwa byepi?”

“Kechi pajipo lupusano ne.”

Mwaka wapichile. “Sala, pano kiji byepi?”

“Kechi pajipo lupusano ne.”

Myaka teeni yapichile. “Kechi pajingapo lupusano ne.”

Myaka tweti-faivi yapichile. “Kechi pajingapo lupusano ne.”

⁹⁵ Abulahama, mukifulo kya kwikala wakooka, aye wailengatu na kukosa na kukosa. Aye wayukile mba kikekala kya kukumya kikatampe kimye kyonse, mambo aye waketekejile Lesa, kabiji aye kechi wazhinakule mulaye wakwa Lesa kupichila mu kubula lwitabilo ne. Aye waambile mba, “Tukekala naji!” Kabiji lukeelo lumo munda mwa kwa Sala mwatatwile kuvimba, kabiji Izaka wasemekelwe, mambo Abulahama waitabijile Lesa. Kabiji aye watajilenga pa bintu, kabiji ne kwibiteela abya bintu byabujileko nobe byajinga konka.

⁹⁶ Kechi mwayila kumvwa ne, kechi ku meso ne. Kechi wendela ku kumvwa ku mubiji nangwa ku meso ne. Kana konka ku lwitabilo. Kabiji umvwe Lesa walaya kiji kyonse, waambile mba, “Bintu byonse byo mwakonsha kwipuzha, inge mwalomba, ketekelai mba mwikitambula,” pano kwachijijilai ku kyokyo. Lesa ye waambile byobyoy, kyafwainwa kwikala byobyoy! Amena. Bademona!

Lwitabilo mwi Taata, lwitabilo mu Mwaana,
Lwitabilo mu Mupashi Wazhila, basatu mu
Umo;
Bademona bazakama kabiji bandengamambo
babuuka;
Lwitabilo mwi Yehoba lukasung’anya kiji
kyonse.

Abyo ibyo. Oo, ami! Kine byokiji. Ikalai na lwitabilo mwi Lesa. Talai kwi Aye. Kechi mwakonsha kwenda ne. Ikalai ponkapa. Lesa ye waambile byobyoy!

⁹⁷ Kabiji, bademona, bo baka? Ke bintu bya bumupashi. Pano, ba—ba dokotala baamba mba, “Uji na kaasa. Uji na TB. Obewa uji na kabale. Obewa uji na musongo wa ku mapwapwa. Uji na *kikye*.” Ke diabola. Ke bumi, kabiji kunyuma ya bobwa bumi ke mupashi. Baanga bayuka kabiji bakonsha kumona mba kaasa, kabale, kiji—kiji. . . Ke mupashi, uji—uji na bumi mukachi kaji. Kyawama, kafwako kyakonsha kwikala na bumi kwakubula mupashi ne, mwamona, nanchi kwafwainwa kwikala bumi bwa kwikingijisha kyokya, pantu pamo.

⁹⁸ Nangwatu kyokya kichi kiji na bumi mwi akyo. Sayaasi yense muntanda kechi wakonsha kulenga jibula ja lusono ne. Bushe mwayuka kyokyo nyi? Balenga kintu kimo kimweka nobe akyo, bino kechi bakonsha kutana ndoonda a bumi ne. Awa ke Lesa. Mwamona? Yesu waambile ku kichi, “Wafingwa obewa. Obewa kechi ujipo na kipangwa ne, kabiji kechi ukekalapo na kikwabo ne.” Bapichilepo jibiji. Kyajinga nobe eiti koloko lwa lukeelo. Wapichilepo jibiji pepi nobe leveni koloko, kimye kyo bailenga ku kajo ka mulajilo. Petelo waambile mba, “Talai kyokya kichi, kyafwa kufuma ku mizhazhi.” Kika? Yesu

wapangilemo bumi bwajinga mu kichi, bwajinga mu mizhazhi, kabiji kyonsetu kyafwile. Aleluya!

⁹⁹ Awa yenka Kilishitu umo wakonsha kupangamo kaasa kufamatu ku mizhazhi, kabiji kyonse kikafwa. Aky a kichi kyaimene popa nobe byonka byo kyajinga, ma awala kasa kikyanyge kubiwa, pakuuba mwataana mabula atatula kuponako, kabiji mwamona kyula kyatatula kutunuka. Kabiji aky... Kyatatulwa kunyonga, juba pa juba, ne mulungu pa mulungu, kabiji pakupitapo kimye kicheche kechi pashalapo nangwa kacheche ka kishiki ne. Aleluya! Kaasa, kitumbwa, kabale, nangwa kiji kyonse, kyakonsha kuya inge Kilishitu waamba. Aye wapangilemo bademona. Kabiji Aye waambile mba, “Mu Jizhina Jami bakapangilamo bademona, bakamba na jimi ipya, bakatola miloolo, nangwa batoma bifwana, kechi bikebabeleka ne. Inge bateteka maboko abo pa bakolwa, bakakosa.”

¹⁰⁰ Anweba mwamutemwa Aye nyi? Amiwa mundekeleko mambo Nemulama awala umo mute uno, nakwikala muno. Anweba mwamutemwa Nkambo? [Kipwilo kyaamba mba, “Amena.”—Waku.] Kika kisakumweka pano? Inge waitabila Kilishitu kwikala lubuko lobe, kabiji ketekelai mu muchima wenu amba kintu kimo kyamweka kwi obewa, kabiji waketekela mba wabukwa, anweba musa kuketekela mba mwabukwa nyi? Kechi muleke diabola abikepo kintu kikwabo pe obewa ne. Twajijilatu na kuya.

“Dokotala,” waamba—waamba mba, “dokotala, kimweka byepi?”

Aye waambile mba, “Kika, kikijitu ponka.”

¹⁰¹ Mu muchima obe wayuka, wayuka kyamwekele. Uu! Kintu kitanshi mwayukatu, kwaamba mba, “Waamba mba, nakumya kika kyamwekele ku kyokya kintu?”

¹⁰² Nanchi ambai mba, “Talai, dokotala, Amiwa nsakwimubuula. Akino kyo kyamwekele, Yesu Kilishitu wambukile. Abyo ibyo. Yesu Kilishitu wambukile.”

¹⁰³ Kijitu bulongo, twayai tukunyike mitwe yetu pa kakimye kacheche. Mulongo Willett, wakonsha kwiya kuno pa mineti umotu, mulongo?

¹⁰⁴ Pano, Taata Wamwiulu, twasachila Mashi akwa Kilishitu. Kabiji kapepo kimye kimo awa kalume Wenu, Nkambo, kechi wingijisha maana ne, pa kwamba kimye kyabaya. Bino kape Ng’umvwa nobe Paulo, ao wasapwijile bufuku bonse bufuku bumo. Mulongo mucheche waponene pa windo ne kufwa wafwa. Kabiji awa mutumwa, na Kyambo kya Lesa mu bumi bwanji, wayile na kulajika mubiji wanji pa nsongwalume, bumi bwabwelele mwi aye kabiji waikela na bumi jibiji.

105 Lesa Mutemwe, Navuluka kuuba mba kuzhika kwa juba kwa ino ngikelo yafikizhiwa, bimye byabaya byapita, kushikamana kwa juba kwapita, bivule bya mabaanga abufuku bibena kufikizhiwa. Kyeya Kikatampe kibena kusama kufuma ku Bufumu bwa Lesa, pakuuba mba busende kifulo kya mfishi ikatampe ibena kwiya pantanda. Lesa, Nayuka mba Mbeni kuya na kukoma pa juba pa juba. Ndekai ngyenga, Nkambo. Mpai bulume. Kwashai kubulang'ana abwe Bukine konse konse. Tukwashai, keesha mute, pakuuba mba tukomvishwe byavula.

106 Kabiji, mutemwe Lesa, peshai jije jibumba jicheche mute uno. Bufuku buno, byo basakupwila mu mpwijilo ya lubuko, lekai mwanamulume yense ne mwanamukazhi bekale pamo bayenga na kwisamba, kabiji ne kwamba mba, "Pano, kino ke...kechi—kechi mwikale na luzhinauko ne. Twayuka kokifumina pano. Twayuka mba ke diabola. Kabiji twayuka umvwe wafumamo, wafwainwa kwiya na mukambizho wakwa Lesa. Aye wafwainwa. Lesa ye waamba byo. Wafwainwa kufumamo." Nanchi, abo balupuke, na lusekelo, basangalala, na kushimuna lubuko lwabo. Kafwako, kechi pekalepo nangwa kimo kyakonsha kwimana mujishinda jabo ne, ne jikwabo; yaingatu, kasa waketekela.

107 Kabiji, Lesa, lekai kikye kipwilo kicheche muno, ne bibye bipwilo mo byumvwang'ena, bakekale na kusangululwa pa kupwisha ino mbung'eno, Nkambo, abo bo bakekisenda kwikitwala, kabiji ma aduleendi a myeo yavula ikaletwe mu Bufumu bwa Lesa. Kiswishai kye, Taata. Lekai banabalume ne banabakazhi muno, kufuma kubushiya bwa byaalo ne bifulo bikwabo, lekai basende Mbila kuya ku bipwilo byabo, kabiji lekai bekale na kusangululwa kwa musango-wakala. Kiswishai kye, Nkambo. Tulekelaike mambo etu pano. Tukwashai kwikala bakalume Benu. Mu Jizhina ja Yesu Kilishitu. Amena.

108 Nakumya, mu kimye kyo mwaikala muno, mujipo ndengamambo muno mukishimikwa, wakonsha kwamba mba, "Mulongo Branham, mvulukeko mu milombelo?" Wakonsha nyi, sutulai kuboko kwenu? Bushe mujipo muntu ndengamambo nyi? Amiwa kechi...Lesa akupeshe, inetu. Bushe kuji nyi? Lesa emupeshe, mwane. Anweba, ne anweba, ne anweba, Lesa emupeshe. Nakumya kana mubena...Pano, akye ke kya kwi anweba.

109 Monai, Amiwa kechi naketekela kubwela mu jibumba ne. Amiwa kechi ndengulula bakwetu be kyuba ne. Amiwa kechi naketekela kuya mu jibumba na kweseka kudoosa muntu umo ne. Mwamona? "Kafwako muntu nangwa umo wakonsha kwiya ne, kanatu ba Taata Bo bamukoka." Mwamona? Abyo ibyo. Anweba mwakonsha ku mundoosa kyoabula kusaka. Mwamona? Bino inge Lesa wakokosha pa muchima obe, obewa wi muntu wakila mukushukwa pantanda. Anweba kechi mwayuka bantu baanga bo Naamba nabo ne.



LUFUNJISHO LWA PA BADEMONA — KIBESE KYA KU MUBIJI KDE53-0608A
(Demonology — Physical Realm)

LUFUNJISHO LWA PA BADEMONA LWALONDAKANA

Ino Mbila na Mulongo William Marrion Branham, yalupwilwe patanshi mu Kizungu pa Kimo mute, 8 Kapyatoto, 1953, pa Roberts Park Amphitheater ku Connersville, Indiana, U.S.A., byafumishiwa pa tepu ukwata ne kufyatula kabiji bya nembwa mu Kizungu kwa kubulwa kupimpulwa. Ino ntuntulwilo muki Kaonde ya nembelwe ne kusampanya na ba Voice Of God Recordings.

KAONDE

©2023 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Kayukilo ka kuvuzha

Luusa lonse luji kubene. Awe buuku mwakonsha ku mupulita ku kya kupulitako kya pa nzubo pakuuba mba anweba bene mwakonsha kumwingijisha nangwa kupaanwa, kyatuutu, nobe jishinda ja kunsampwilamo Mambo awama a Yesu Kilishitu. Awe buuku kechi wakupotesha ne, kulengamo avula, kutumwa palubesha, kufiwa mu makopyuta, kututululwa mu milaka ikwabo ne, nangwa kwingijisha mukumwenamo mali kwakubula kuswisha kwanembwa kufuma kuba Voice Of God Recordings®.

Pakukeba kuyukilapo bikwabo nangwatu mabuuku akwabo, mwane tumai pa:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org